

# Chors da giuvenils en concorrenza

Top junior musique – in project dals radios da la SSR SRG per 2019

■ (cp) «TOP junior musique» – uschia sa numna in project dals radios da la SSR SRG per 2019. Sut quel titel han ils radios SRF Musikwelle, RTS La première, RSI rete uno e RTR Radio Rumantsch lantschà ina concorrenza per giuvenils en las spartas: musica populara, chor, musica instrumentala ed acordeon. Sonda, ils 11 da matg a las 19.00 sa mesiran quatter chors a Glion en la baselgia claustrala. Tge chor va la fin da settember a Crans-Montana en il final da la concorrenza «TOP junior musique»? Quel final vegn emess lu directamain da las televisiuns svizras SRF/RSI/RTS. La decisiun vegn dada ils 11 da matg a Glion en baselgia claustrala. A quest concert organisà da Radiotelevision Svizra Rumantscha RTR sa participeschon quatter chors d'uffants e giuvenils da renum:

La Svizra taliana vegn represchentada dal renumà Coro Calicantus da Locarno. Mario Fontana, fundatur e manader, numna sia scola da chant «una grande famiglia». La scola da chant Calicantus è vegnida fundada 1993. Ella dumbra 150 scholaras e scolars da 4–18 onns dividids en quatter stgalmis. Il Coro Calicantus, il chor da concert da la scola cun ses repertori fitg vast che tanscha dal baroc fin a la litteratura contemporanea, tgira in chant d'alta qualitat. Ils 34 uffants vegnan accompagnads al clavazin da Simona Crociani e dirigi da Mario Fontana.



Per la Rumantschia va l'ensemble Picant al cumbat da chant nazional.

MAD

fants vegnan accompagnads al clavazin da Simona Crociani e dirigi da Mario Fontana.

Da la Svizra romanda vegn ina furmazion da la Schola de Sion a Glion. Fundada 1930 dumbra questa Schola de No-

tre-Dame de Valère oz 140 uffants e giuvenils dividids en sis diversas furmazions. Ina funcziun centrala è d'embellir ils ser-

retschs divins en la catedrala da Sion. Daspera vegn concertà stediain. Il director Marc Bochud dat paisa ad ina furmazion solida ed ad in chant cultivà.

Ina furmazion vocala interessanta represchenta la Svizra tudestga, il Chor Amazonas Kids & Juniors da Steinach/SG. Cumenà ha tut 1995 cun 10 uffants. Il flum Amazonas stat qua sco simbol da lur chant che duai adina esser en moviment ed uschia tutgar l'auditori pli intensivamain. Cun lur vuschs frestg-poppigas vegnan ils 17 giuvenils a fascinar in e scadin a Glion en baselgia claustrala. Il chor vegn accompagnà da divers instruments. Maja Beck-Bänziger è la manadra musicala.

Per la Rumantschia va l'ensemble Picant en quest cumbat da chant. Las 20 chantaduras da la Surselva derivan dals chors d'uffants Sumvitz e Surselva e sa preschentan cun lur duas dirigentas Flaviva Walder e Rilana Cadruvi. Clau Scherrer suna il clavazin.

Chors da giuvenils – en concorrenza. Il concert moderà dad Elin Batista ha lieu sonda, ils 11 da matg a las 19.00 a Glion en baselgia claustrala. El vegn registrà e filmà dad RTR. L'Artg musical da dumengia, ils 12 da matg 2019 (14.00) emetta el en si'entira lunghezza. L'entrada è gratuita. RTR envida vus cordialmain a quest event interregional.



Ils chantauturs sursilvans Alexi Nay e Marcus Hobi han cooperà al concert dal CHOR da l'Uniu grischuna S. Gagl.

MAD

## Chantar fa plaschair

Il concert annual dal Chor da l'Uniu grischuna da Son Gagl

■ Cun la chanzun «Chantar fa plaschair» dad Uli Führe ha introduci il Chor da l'Uniu grischuna da Son Gagl ses concert da questa primavaira en la baselgia bain emplenida da St. Fiden a Son Gagl. Dapi intgins onns stat quest chor sut la direcziun versada da Manuela Bühler. Las provas vegnan fatgas minga mesemna saira davent dal schaner enfin il matg. En quest curt temp ha ella exercità cun ses chor da passa 50 chantaduras e chantadurs prest in tozzel chanzuns rumantschas. Uschia èn resuadas tranter autras las chanzuns «Sulegl» dad Albert Spescha, «La damaun» da G. A. Derungs, «l'En» dad Armon Cantieni e «Sut tschiel steliu» da Tumasch Dolf. Cumbain ch'igl è diversas chantaduras e chantadurs che na san betg rumantsch èn vegnidas chantadas las emprimas chanzuns perfin a memoria. Quai è bain ina prestaziun remartgabla!

Ils dus chantauturs, musicists e cumponists, Alexi e Marcus han alura enritg quest concert zunt varià cun insaquantas da lur chanzuns. Igl è 35 onns (sic!) ch'il Songagliais Marcus Hobi ed il Sursilvan Alexi Nay èn sa mess ensemble per

cumponer e producir chanzuns rumantschs actualas. Il simpatic duo è dapi lura enconuscent lunsch enturn ed ha dentant già produci quatter discs cumpacts. Dal reminent, il tschintgavel duai cumparair l'october vegnent. Da cuminanza han els chantà ina dieschina da chanzuns, Marcus accompagnond quellas cun la gitarra e tschivlond, daferant ch'Alexi ha accompagnà inqual chanzun cun il clavazin u cun il tamburin u cun la suna a bucca. En quest connex èsi da menziunar la chanzun «Tat e gat» ch'ha plaschì spezialmain bain a l'auditori. Avant ch'il concert tant plaschavel sco divertivel è i a fin cun la chanzun cuminaivla «Sas aunc» ha profità il cunchantadur Christian Merz – ch'era pli baud activ durant biers onns sco plevant a Samedan – da l'ocasiun d'engraziar cordialmain a Gion Pieder Casaulta per sia premurusa lavur sco parura da l'Uniu grischuna da Son Gagl.

La proxima chaschun d'udir il chant dal Chor da l'Uniu grischuna è ils 14 da settember en il rom da l'emprima «Notg dals chors songagliais».

Gieri Battaglia

## Inscunter interrumsch a Turitg

Cun Rico Valär e la cantautura Fiona Cavegn

■ La URB – Uniu da las Rumantschas e dals Rumantschs en la Bassa – envida sin gievgia, ils 16 da matg naven dallas 19.00 a siu secund inscunter interrumsch dad uonn en la Giesserei Oerlikon-Turitg, Birchstrasse 108. Hosps dalla sera ein Rico Valär da l'Universitad da Turitg e la cantautura Fiona Cavegn.

### Rico Valär

Valär, professor extraordinari per litteratura e cultura romantscha all'Universitad da Turitg, ei carschius si a Zuoz en Engiadina Aulta nua ch'el ha era fatg il gimnasi. Lu ha el studegiu cumparativistica dils lungatgs neolats, romantsch e litteratura franzosa all'Universitad da Turitg. En quei temps ha el fatg viadis e studis en Haiti, Portugal, Rumenia e Mexico. Sia dissertaziun ha el scret sur da Peider Linsel e la historia dil moviment romantsch. Allas auditoras ed als auditurs da Radio e Televisiun Ruman-

tscha eis el bein enconuscents sco moderatur da discurs sur cultura e lungatg.

El vegn a dar investas en la historia ed il svilud dalla retoromanistica all'Universitad da Turitg, situaziun e projects actuals, pertgei studegiar romantsch, co studegiar romantsch. El ha in interessant e vast curriculum e vegn a relatar dallas sfidas e schanzas actualas dil studi da romantsch all'Universitad da Turitg. El vegn era bugen a rispunder a vossas damondas e remarcs.

### Fiona Cavegn, cantautura e commerzianta

Cavegn ei naschida 1989 e carschida si a Breil ed habitescha oz a Turitg. La musica ei adina stada ina cumponenta impurtanta da sia veta. Sin fundament da sia vusch extraordinaria vegn ella oz denter auter era numnada Amy Winehouse Rumantscha. Ella ha presentau uonn siu project «Scheniv». Adina pu-

spei publichescha ella novas singles. Ella conta per romantsch ed engles. Sia musica ei jazzig Neo-Soul cumbinada cun ina presa R'n'B. Nus selegrein sin sias canzuns che muentan e delecteschan.

Ei vegn offeriu in aperitiv. Tier in bien sitg datti era temps e peda per in bien discurs. Ins sa era empustar ina fina tscheina. Fagei paleis questa occurrenza ad enconuscentas ed enconuscents. Sin seveser!

La serada entscheiva enturn las 19.00. Ins sa era vegnir pli tard cura ch'igl ei. Sin seveser ils 16 da matg ad Oerlikon.

La Giesserei ei da contonscher naven dalla staziun Oerlikon en ca. 10 minutas a pei en direcziun da Regensbergbrücke tras Affolternstr.–Oleanderstr.–Regensbergstr.–Birchstr. Ulterioras informaziuns sut: [www.uniun-urb.ch](http://www.uniun-urb.ch) e [www.facebook.com/URB](https://www.facebook.com/URB)

Proxim inscunter: Gievgia, ils 12 da settember 2019 ad Oerlikon  
Mesjamna, ils 16 d'october 2019 a Berna

Per la URB: Ciril Berther



Rico Valär e la cantautura Fiona Cavegn.

MAD